

Daankwoord oet Vruntelekheid

Geachte Veurzitter en raods-lede,

tijens de stadsrunde en bij toeskoms waar iech verpópzak wat miech waar euverkoume.
Mesjiens is dit veur aandere niks apaart en vinde ze dat gewoon meh veur miech waar dit hiel get en neet allein um aonhuurt te weure meh ouch um behandeld te weure es n'ne Mestreechterneer.

't Is 'tzelfde este op dien wèrk 'n sjouwerklöpke kreigs boedoor'ste inins, twie kier zoe hel geis wèrke. Um dat te veurkoume höb iech vreuger hiel good naogedach wat iech later wouw goon weure en koos iech wies veur 't chauffeursleve daan hadste neet allein 'n zittend beroop meh de wèrks ouch meh gans allein. ...n'ne Awwé kloet moot zoe noe en daan ins kinne want te same zien veer ouch meh gewoon lui oonderein.

De complimente euver n'ne brief dee iech 10 voudeg had ingesjik in mien moojertaol had iech noets verwach en al gaar neet in de Gezèt. De hier vaan Lune dee miech hei-euver geattendeerd heet is bij dees, zieh bedank! Iech mós bij mien vrouw dao-euver nog zelfs'n traonsje eweg pinke! Jeh iech bin dat neet geweend bis aandere get veur miech trök doen.

Aon de gene wee miech dat geflik heet....n'ne Hiele Groete Merci !!

Veurwat e Daankwoord geriech aon uuch, umtot iech dit oet Fetsoen daon. Nao de zitting hoort iech complimente vaan chauvinisme en voelt iech miech verhiemeld, meh 't zat miech ouch aon 't dinke. Aandere zègke wel ins tege miech, Joe diech bis vaolste good veur de lui, mehjah dat zit in 't blood en iech zouw ouch neet anders wèlle zien.

“Daoveur e stökse vaan miech aon geer gesjreve, n'ne merci tot iech dit es Mestreechterneer same met uuch moech beleve en geer miech daoneve de gelegenheid gaof um de riddentie oonder mekaar in us moojertaol te doen in de tied vaan-me-leve“ !

Wat heet n'ne Sjèlder, Diechter en Sjriever in euvereinkoms.....es ze veerdeg zien pakke ze ziech 'n nui blaanco blaad en goon ze wijer boe ze eigelek oetgesjeid waore . De eine zèt 't blaad op ziene ezel, d 'n aandere neump ziech 'n pen en iech zelf daon 't via mien toetsebord, dat sjeelt diech n'ne houp kramp in dien han en vinger.

Sjèlders ute ziech in beeld en sjrievers ute ziech in teks meh 't geveul bleif ummerskiers 'tzelfde, de zouws bijnao zègke tot 't 'n passie is en mesjiens is dit ouch wel zoe, teminste iech beleef dat zoe es iech in mien Moojertaol sjeif. Us taol is neet zoe meh 'n taol, 't is de taol vaan verbinding zonder sjaome, 't is de taol vaan zoewel eur- es mien eige -Stad,

Bij inkoms tot nao de zitting hoorde iech of iech vaan 't Veldeke waar meh dat is neet zoe. Veldeke Krink Mestreech is boe iech tege op loer, in positieve zin vaan de wäörd te verstoon.

Geer kin miech zien es n'ne Freelancer vaan 't Mestreechs want die taol höb iech zoe liere sjrieve en spreke vaan D'n Tempeleer. 'n Gezètje wat jaor nao jaor oet keump, zoe ouch in miene tied, de jaore zeventeg. Aander kinder spaorde toendertied spèngkes , donald duck of suske & wiske beukskes mèh iech spaorde Tempeleers gezètsjes want dao kós iech in zwoerdere tied op trök valle.

Emiel snijde vreuger zien puppekes in n'ne stal en iech leesde mien gezètsjes in 'n heukse op mien kamer, die iech nao verloup vaan tied daan ouch kós druime. 't Mestreechs heet hiel vääf verzachtende wäörd en veur miech waor dat (is nog) mien taol vaan de lach en traon.

't Mestreechs sjrieve is gekoume door wat aandere toendertied ouch gere dege, 'n daagbook bijhawwe. Es iech vaanoet sjaol toes kaom loerde iech meteen in de gezètsjes um te kieke of iech de gesjreve wäörd good had gesjreve. Ja iech weet 't, 't is besjaomend jao.....groet getrokke met de Tempeleers, mojle wie de tempeleers en sjrieve wie de tempeleers, iech bin dao ouch neet Gruuts op, nei.....dat is meh awkloete, wie gruuks en Mestreechser kinste zien !!

Iech perbeerde tijdens de opmars vaan de taolvervolging op sjaol ederein te verbeterne meh dat waor dweile mèt de kraon ope, gegeeve ougeblik móste daan 'n striep goon trekke veur diech zelf. De kós aon sommege kinder zien tot ze daodoor ouch zelf geraak waore en meujte hadde mèt bepaolde wäörd, mehjah wat dege v'r draon, 't waor verpliech heh.....vreuger!

Nao de zitting vaan de Stadsrunde kraog iech ouch 'n compliment euver mien Nederlandse spreektaol meh ouch die is es freelancer vrij vertaold gewore vaan 't Mestreechs direk nao 't Nederlands, allein mèt get minder klaank en laank drachter. Dit höb iech miech zelf aongeliend um die twee gesjeie te hawwe. 14 maonde dene es Verkenner in de Johan Willem Friso Kazern te Asse deeg tege alle verwachtinge in, woondere.

Iech bin neet ummertouw veur mien Stad dao gewees es Mestreechterneer en leep iech eigelek in n'ne groete baog drumheer want 't waor miech allemaol te wêld hei, tevaol woort verinnereerd en dit deech miech pein aon mien hart. 6 jaor wêrkte iech op 't verf-fabrik in de produktie meh um dao dien leve laank te versliete is neet get, um euver nao hoes touw te sjrieve en zoe ginge v'r daan wêrke bij 't Peerd vaan Beite es chauffeur al waor die kaar achter dat peerd toendertied Veileger, daan al dat aajd matriaol boe v'r mèt móste rije op de openbare weeg.

Nao pak weg 3 maond ging iech vaan dao-oet via n'ne sollicitatiebrief nao transportbedrief Frans Maas in Venlo en die plaots laog ouch neet neve de deur vaan us Mestreech. Nao 'n aontal jaor vroge ze dao of iech neet in Venlo wouwe koume woene meh dien hart en geveul is toch op de ein of aander meneer verboonde mèt us stad Mestreech. Iech neumpde dat eurke rije op en neer nao Venlo daan ouch op de kouw touw.

Oetindelek nao 'n 5 tal jaor kraog iech in 1995 'n noedlotteg zwoer oongelök mèt miene motor in us stad Mestreech en 'n aontal jaor daonao kraog iech same mèt mien vrouw 'n zwoer oto oongelök in Belsj meh gelökkeg kóste veer dat, same zelf nog naovertele.

Na jaore vaan herstel en 'n euvergehawwe invaliditeit mèt n'ne döbbele discus hernia es bijkoumende sjaoj wat neet te geneze velt mós iech daan aon miech zelf bekinne tot iech mèt mien leve 'n rondsje had gemaak roontelum us stad Mestreech, boe fotografie, wandele en sjrieve de sleur vaan mien aofgekäörd leve op d'n door kós verzachte.

18 jaor höb iech internet ervaring opgedoon in 't bouwe vaan websaajts en begós iech get paasjes aon te make die iech daan in mien Moojertaol sjreef en via dee weeg dat zelfde menneke vaan vreuger obbenuits tegekaom. Datzelfde jungske dee iech dao door de taolvervolging op zien kемеke had achtergelaote. Jao..... n'ne depe Zöch.

Jaore kaome en ginge veurbij zjus es Börgermeisters wie de stelte in us tuindörp Treechterveld inins woort verbroke. Nao dik 70 jaor op noedwoninge te höbbe be- en ge-spaort voont de Verheurder 't tied veur nui planne. Noe woene veer dit jaor al bijnao 3 jaor in us nui woening en kumpste drachter tot de tied vluig door us stad Mestreech.

Zoe begóste'ze inins euver e look in uzze iewege Stadsmoer en waor iech dao present vaanaof 't ierste oor. Moje deeg iech daan neet wel luustere want dat kin iech es de bèste , (al waor dat vreuger netuurlek minder) es iech daan toes kouw sjreef iech dao-euver mien verslaag in us moojertaol. Zoe kóste de lui teminste die 't Mestreechs kinne leze, toch leze wat dao gezag waor gewore.

Daonao kaom de Begraofplaats veurbij mèt zien gesjiedenis en toen voont Slivvenhier 't sjenbaor genóg gewees want dee stoont mèt ziene toeter in mien oere te bloze, n'ne soort wake up call. Want laote v'r ierlek leef lui, de kins neet konstant meh door goon mèt de stad te verandere, Mestreech is 'n stad die neet gebouwd is gewore veur de moderne tied want hei versjuifste get en dao oontsteit daan obbenuits 'n aander probleem. Stèllekes weurt daan in gedachte gezag, ach dat zien v'r daan wel weer. Meh mèt zoe'n gedachte kraogste vreuger op sjaol 'n dikke oonvoldoende.....wie de tied toch neet verandert heh.

Daoneve bloijt bij hiel vööl Mestreechternere h'n hart, die wel in Mestreech woene en ziech verboonde veule meh daoneve neet mie aonwezeg zien hun de stad. Zoe wie us zelf.

-

In oktober 2017 bin iech (um neet es 'n naobedach te eindege) begós mèt mien Campagn #Moojertaol op facebook en hób iech neve miene eige naam ouch nog 'n aander Fb paasj boe iech dit publiceer onder de naam: * 'Vaan Huure Vertèlle'

Iech hób same mèt mien vrouw 'n oonderzoek gedoon nao us moojertaol in en roontelum Mestreech meh 't Veldeke heet dit ouch hiel sjoen verwoord mèt h'n eige kinnes. Us oonderzoek steit op us * paasj onder Notities : “Veur 't belaank vaan us Moojertaol” , moch geer dao veur geïntresseerd zien.

Speciaal veur dat oonderzoek had iech zelf 'n Grafisch ontwerp gemaak mèt es titel:

“Hart Veur us Moojertaol”

Dit is 'n Logo es e Hart vaan twee han die in mekaar geslage zien, ein hand prizzenteert 't veendel vaan Mestreech en de aander hand, 't veendel vaan Limbörg. Geboonde is 't de Provincie Limbörg met de hoofstad Mestreech. En este de Titel aofkorts keump dao ouch 'n Beer-soort te veursjein:

H.V.u.M.

De Provincie steit veur 't Pèls en us hoofstad Mestreech es de aw stad, 't Aajd !

Iech maag mèt groete Gruutsheid zègke tot Transportbedrief Curfs oet Gronsveld vaanaof vriedag de 23ste fibberwarie mèt us Logo rijd. Veer veule us daan ouch grutser es Gruuts Al heet 't logo veur miech de weerde aon us moojertaol, zien aander lui dao-in:

- 't Hart veur de Provincie mèt hoofstad Mestreech
- De chauffeurs zien 't es teike vaan Herkoms, leefde veur de zuideleke Provincie vaan Nederland.
- Meh de aofkorting vaan uzze titel H.V.u.M. , kin ouch “Hart Veur us Mestreech” zien.

God wèt , wat aandere ziech nog zelf (goon) bedinke wie langer tot 't in umloop is!

Wat begós mèt 'n hart veur mien moojertaol begint ziech laankzaam oonder de lui te ute es leefde veur de Provincie. Mage v'r in eder geval blij zien tot dao eine vaan us zit :) (smiley)

Iech wèl mèt de leefde vaanoet us Hart uzze breef aofslete en uuch bedaanke veur al eur Vruntelekheid es de persoen deet geer zeet en n'ne groete Merci tot neet allein miene breef meh ouch us Moojertaolgesjrif gehuur heet gekrege, boe iech euveregens content euver bin.

Complemente,
Joe Thomissen